



# Վարխաանգ Անանյան

## Հովազաձորի գերիները

8

Գլուխ տասներեքերորդ. Թե ինչ է ստացվում, երբ անփորձ մարդը փորձում է որսորդությամբ զբաղվել

Այդպես, որսը ձեռքից թռավ: Մինչ շատն ու Գագիկը ափսոսանքից թևները թուլացած կանգնել էին, Աշոտը, չգիտես ինչու, նորից ոգևորվել էր:

Տեսա՞ք, ալեկոծվեց նա: Հիմի որ մերն են, գնա՛նք...

Գագիկը տեղից չէր շարժվում:

Մինչև չհամոզվեմ, որ մերն են, ես դրանց հետևից գնացողը չեմ, հայտարարեց նա կտրուկ: Ասա՛, ինչո՞վ են մերը:

Քննության ժամանակ է, տո՛, գոռաց որսի տեսքից տաքացած Աշոտը, բայց ճարահատյալ պիտի բացատրեր: Դ՛նքո՛, չե՞ս տեսնում, որ իջան ժայռի տափակ կտուրին...

Է, հետո՞, որ տափակ տեղը իջան, ուրեմն մե՞րն են... Բան ասա գլուխս մտնի:

Եվ Գագիկը ցուցամատով սկսեց կտկտացնել իր ճակատին:

Շատն ևս չէր հասկանում Աշոտի միտքը (նա կարավ որսած չկար և չգիտեր այդ թռչունը որսալու ձևերը), բայց անհարմար էր, ինչ վիճելու, ինչ հարցուփորձի

Ժամանակ էր: Պե՞տ կա, կարգադրո՞ւմ է՝ գնա առանց առարկելու, ուրեմն մի բան գիտի, որ կարգադրում է: Գոնե Հասոն այդպես էր սովորել ֆերմայում, ավագ հովիվը բա՞ն է պատվիրում, ձեռքդ դիր աջ ունքիդ ու ասա՝ «Լա՛վ, աչքիս վրա...»:

Դնբո՛, չասացի՞, որ խոր ձյունի ժամանակ կաքավները կամ ճեղքերն են մտնում, կամ եթե ճեղք չկա՝ անցնում են ձյան տակ: Էնտեղ ճեղք չկա, տափակ կտուր է... Չտեսա՞ր, որ իջնելուն պես անհետացան... Գնա՛նք, շո՛ւտ...

Տե՛ղ հասավ, մատը ճակատին կտկտացնելով համաձայնեց Գագիկը և հետևեց ընկերներին:

Այս անգամ քայլերը դժվար չէր, որովհետև նրանք վերադարձնում էին իրենց գցած ճամփով: Մոտեցան իրենց բնակարանին և ծովեցին դեպի ձախ. պիտի վեր բարձրանային: Այստեղ էր, որ սկսվեցին անասելի տանջանքները, ձյունը մինչև գոտկատեղն էր հասնում, այդպիսի ձյան միջով կարելի է դեպի ցած գնալ, իսկ դեպի վեր գնալու համար առնվազն պետք է կուշտ լինել, «ներքին այրման» պաշար ունենալ:

Հասո՛, Բոյնախին տար Շուշիկի մոտ ու շուտ ետ արի, հևալով և ճակատի քրտինքը սրբելով պատվիրեց Աշոտը:

Տվեք՝ մուրճեր են, ինչ են, դրանք էլ տանեն:

Հա՛, տա՛ր, ծանր են... հիմա սրանք պետք չեն...

Ներքև, դեպի աջ, թփերի մեջ երևաց Սարգսի գլուխը: Նա շարժում էր որևէ թուփ, ձյունը վրայից թափում ու տնտղում՝ հատապտուղ էր փնտրում: Ի՛նչ հաջողություն ուներ նա այնտեղ, հայտնի չէր, բայց քանի որ դուրս չէր գալիս թփուտից և չէր գնում կրակի մոտ, ուրեմն մի բան կար:

Հասոն վերադարձավ իր մահակը ձեռքին ու թափով առաջ ընկավ: Այդպիսի ձյուն նա շատ էր տեսել, շատ անգամ էր հոր հետ միասին ձյան մեջ հոտի համար ճամփա բացել դեպի հանդը: Իսկ հանդում թիակով քերում էին ձյունը և ոչխարները արածում էին նրանց բացած խտոր:

Եվ հիմա Հասուն հենվում էր իր ամուր մահակին, ուժ տալիս ու ցատկում դեպի առաջ, ինչպես փայտի օգնությամբ կցատկեն որևէ խոշորդոտի վրայից:

Այդպես ցատկոտելով նա հասավ կաքավների իջած «կտուրի» եզրին և լուռ ցած նետեց իր մահակը:

Նույն ձևով, բայց պակաս վարպետությամբ փայտից օգտվելով, տեղ հասավ նաև Աշոտը, իսկ նրա հետևից արդեն տրորված ճամփով վեր էր բարձրանում Գագիկը: Նրա լեզուն թեև «քոր էր գալիս» (սուր բան ուներ ասելու Աշոտի հասցեին), բայց պապանձվել էր թե՛ նապաստակի դեպքը հիշելով և թե՛ այն պատճառով, որ Աշոտը ձեռքն իր բերանին դնելով՝ շարունակ լուռ մնալու նշան էր տալիս:

Երեքն էլ «կտուրի» եզրին շունչ առան: Աշոտը զգուշությամբ առաջ գնաց մի քանի քայլ և երբ ետ նայեց, ընկերները արտակարգ ալեկոծության նշաններ նկատեցին նրա դեմքին: Աշոտը ձեռքը դնում էր շրթունքներին, առաջ գալու նշան անում, ապա մատը մեկնում դեպի «կտուրի» կենտրոնը:

Գագիկը այնտեղ կաքավների փոխարեն նկատեց իրարից մոտիկ փոսիկներ, կարծես վերևից բոնցքաչափ քարերով խփել էին ձյունին: Քարերը ամբարված ձյան խորքն էին գնացել, իրենց հետևից թողնելով ծոռուսուս փոսիկներ:

Պարզ էր, որ այդ փոսերից յուրաքանչյուրի խորքում մի կաքավ կար նստած...

Աշոտը մի քանի քայլ արավ այնպես անշուկ, որ ձյունով ծածկված թռչունները չլսեցին վտանգի մոտենալը: Հասավ առաջին փոսին, ձեռքը զգուշությամբ խոթեց նրա մեջ (այդպես էր սովորեցրել նրան իր հայրը) և ձյան խորքից դուրս բերեց ձեռքի մեջ խլրտացող թռչունը:

Այդ թպրտո՛ցը... Նա իսկույն տեղահան է անում ու թպրտեցնում որսորդ մարդու սիրտը: Այդ թպրտոցը հանկարծակի հրճվանքով է լցնում մարդուս հոգին և ուզում ես ուրախությունից ճչալ, ճչալ...

Ուրեմն գարմանալի չէ, որ Գագիկը ալեկոծված վրա ընկավ հաջորդ փոսին, պառկեց նրա վրա և երբ ձեռքը փետուրներ ընկան, ճչաց ցնծագին.

Աշո՛տ, բռնե՛լ եմ... հասե՛ք...

Նրա թևի տակից թռչունը դուրս թռավ, իր թևերով ձյուն շաղ տալով տղայի դեմքին:

Սս՛ս՛ս, կամա՛ց, ֆշշացրեց Աշոտը, բայց Գագիկը որսի տեսքից գլուխը կորցրել էր: Նա մեկ այս փոսի վրա էր կռթնում ու խառնում նրա խորքը, մեկ այն փոսի վրա էր պատկում ու փռում իր պիջակի փեշերը, բայց խրտնած թռչունները մե՛կ ոտքերի արանքից, մե՛կ կոնաստակից, մեկ դնչի տակից մեծ աղմուկով-ֆռոռոցով դուրս էին պրծնում ու ձյունը տղայի աչքերը լցնելով՝ թռչում սարսափահար...

Հասոն ևս դես-դեն ընկավ, մի քանի փոսի վրա էլ ինքը պատկեց, բայց կաքավները կողքից դուրս էին թռչում:

Աշոտը կանգնած էր կաքավը ձեռքին և դողում էր գայրույթից: Նրան ժամանակ չտվին ձեռքի թռչունը տեղավորի, ձեռքերն ազատի ու շարունակի իր որսը:

Հիմա՛ր, ի՛նչ ես անում, գոռաց նա, երբ արդեն ուշ էր, բոլոր կաքավներն էլ ճողոպրել էին և ազատվել ուրիշին կեր դառնալու վտանգից:

Էս ինչի՞ չկարողացանք բռնել, զարմացած հարցրեց Գագիկը: Իսկ Հասոն գլուխը կախել և մեղավորի նման ժպտում էր:

Հիմա՛ր, չտեսա՞ր էս ոնց բռնեցի... Ի՞նչ ես չտեսի նման վրա ընկնում... Ձեռքդ էնպես պիտի մեկնես անցքով, որ... Թո՛ւի, ում եմ ասում... Մենակ սրան-նրան ձեռ առնել գիտես... Թո՛ւի, ոնց թռա՛ն...

Այնպիսի ափսոսանքով էր համակվել որսորդ պատանին, որ քիչ էր մնում նստի ձյան վրա ու լաց լինի: Այդպիսի հաջող որս էլ ե՞րբ կպատահի իրենց: Բավական է ձյան երեսի մի բարակ շերտը սատավ՝ կաքավները փրկված են, այնպես կտկտալով կփախչեն, որ հետևներից «ձիավորը չի հասնի», ինչպես սիրում էր արտահայտվել հայրը:

Խու՛մբը լուռ և գլխիկոր վերադարձավ անձավ:

Վա՞յ, կաքա՞վ եք բռնել, ուրախությունից թովոաց Շուշիկը: Բա ինչի՞ է քիթներդ կախ...

Աշոտը չպատասխանեց:

Լուռ փետրեցին թռչունը, գլուխն ու փորոտիքը տվին շանը:

Այնուամենայնիվ Գագիկը չհամբերեց և կաքավը ձեռքի մեջ ծանր ու թեթև անելով, հարցրեց.

Աշո՛տ, ինչքա՞ն կկշռի...

Աշոտը լուռ էր ու մռայլ, նրա մտքում դեռ իրար հետևից՝ ֆո՛ն, ֆո՛ն, թռչում էին սարսափահար կաքավները:

Կես կիլո կլինի... Հա՛, մեր կողմի կաքավները մի վառելի չափ լինում են... Տասը-տասներկու կաքավ, ամեն մեկը կես կիլո... Ուրեմն, Հասո՛, մեր անփորձության պատճառով ես ու դու հինգ-վեց կիլո միս ենք փախցրել մեր ձեռքից: Ափսո՛ս, ափսո՛ս, գլուխը տարուբերելով դառնացած ասում էր Գագիկը: Միայն փոքրիկ բերանի անկյունում հագիվ նկատելի ժպիտը և սև աչքերի չարաճճի փայլը մատնում էին նրա խոսքի մեջ թաքնված հեզմանքը:

Կաքավը իրոք խոշոր էր և գեր: Արագ խորովեցին, հինգ հավասար մասի բաժանեցին և կերան ախորժակով:

Սարգիսը մեկ ցանկացավ հրաժարվել իր բաժնից, բայց թեժ կրակի վրա խորոված կաքավի հոտին դիմանա՞լ կլինի, որ նա դիմանար: Ինքնասիրությունը մի կողմ դրեց և վերցրեց իրեն լուռ առաջարկված բաժինը:

Բոյնախը հափշտակում էր իրեն նետված ոսկորները ու նրա ազահ հայացքը պարզ ասում էր. «Էլ չկա՛...»:

Դե հովիվ Հասոն ինչպե՞ս դիմանար իր «անլեզու եղբոր» այդ աղերսական հայացքներին: Եվ ոսկորի հետ իր բաժին մսի մի մասը ևս տվեց Բոյնախին:

Իսկ Սարգիսը իր բաժին ոսկորն անգամ լավ փշրելուց-ծծելուց հետո հիշեց իր այդ օրվա արարքը, հիշեց, թե ինչպես ինքը խմբից անջատ իր համար մասուր ու մամուխ է ճարել, հիշեց, որ իր «որսից» նա բաժին չի հանել ընկերներից ոչ մեկին ու տարակուսանքով մտածեց.

«Այդ ինչո՞ւ ինձ էլ բաժին տվին...»:

**Գլուխ տասնչորսերորդ. Թե ինչպես բախտը հաճախ ժպտում է անարժան մարդկանց**

Այդ դեպքը պատահեց մեր խմբի գերության վեցերորդ օրը: Այդ այն օրն էր, երբ բնությունը նորից հույսեր էր խոստանում նրանց, չգիտես իրական, թե սին հույսեր: Այնպես անամպ էր երկինքը, այնպես արագ էր հալվում ձյունը ձորի հարավ նայող լանջերին, որ նրա թաց, ծանրացած զանգվածները խոռալով ցած էին թափվում ժայռերից, ծառերի վրայից, գառիվայրերից:

Խոր ձյունը դեռ ոչինչ չի նշանակում, ժամանակից շուտ եկած ձյունը ինչո՞ւ պիտի երկար մնա: Նոյեմբերի արևը Փոքր Կովկասի հարավային լանջերին նույն ուժն ունի, ինչ օգոստոսի արևը Ուրալում:

Սարգիսը, չգիտես ինչու, բոլորից շուտ դուրս էր եկել այրից և նախնադարյան մարդու «մուրճը» ձեռքին սպասում էր. հավանաբար դեռ ազդված էր «կաքավի դեպքից» և մտքում որոշել էր կոլեկտիվի հետ աշխատանքի դուրս գալ: «Այդ ինչպե՞ս էր, որ այնքան չարչարանքով բռնած կաքավից ինձ էլ բաժին հանեցին...», այս հարցը դեռ հնչում էր նրա ուղեղի մի անկյունում,...

Երբ մեր պատանիները դուրս եկան քարայրից և արևի տակ հուրհրատին տվող ձյունը նրանց ստիպեց կկոցել իրենց աչքերը, Աշոտն ընկերներին դիմեց հետևյալ խրատական ու ճոռոմ խոսքերով.

Ահա չորս օր է, որ մենք կարգին ուտելիք չենք գտել: Բայց դա չի նշանակում, թե ուտելիք չկա Հովազաձորում: Դա միայն նշանակում է, որ մենք վատ ենք ճանաչում բնությունը, ինչպես իմ որսորդ հայրն է ասում՝ բնության գիրքը կարդալ չգիտենք: Ամեն չնչին բանի ուշադրություն դարձրեք, ամեն հետք

տնտղեցեք, գուցե մի բան գտնենք...

Ջեկուցումդ վերջացրի՞ր, հեգնեց Գագիկը:

Ի՞նչ գեկուցում, վրդովվեց Աշոտը:

Ներողությո՛ւն, գեկուցում չէր, այլ՝ ելույթ... Հիմա ի՛նձ լսիր: Իմ կարծիքով մենք պետք է այս ձորից դուրս գալու ուրիշ ելք փնտրենք, իսկ դու ուտելիքի մասին ես խոսում:

Իգուր նեղություն չքաշես: Հայրս ասել է, որ միակ ելքը այն կաժանն է, որով մենք եկանք: Տեսե՞ք, մեր աչ ու ձախ կողմերում և թիկունքում ժայռի պարիսպներ են: Մնում է մեր դիմացը, կուգե՞ք, գնանք նայենք:

Իսկ մեր եկած կաժանը երբե՞ք չի բացվի, հարցրեց Շուշիկը:

Մինչև գարուն դժվար թե բացվի... Տե՛ս, հիմա ժամը տասնմեկը կլինի, բայց արևը դեռ այն կաժանին չի հասել. այդ լանջը նայում է արևմուտքին:

Նրանք լուռ դիտում էին այն լանջը, որով եկել էին Հովազաձոր. իրոք, ձյան հալվելու ոչ մի նշան: Այդտեղ փոսերը, քարերը, դարավանդներն ու շավիղները հավասարվել էին առատ ձյան վերնակի տակ:

Իսկ այս ձորն ո՞ր է գնում... Ներքև ինչ կա... Գնանք նայենք, գուցե իջնելու տեղ լինի, լրջացած իրենն էր պնդում Գագիկը:

Լա՛վ, գնանք աչքովդ տես...

Խումբը ցած գնաց և կանգ առավ Հովազաձորը ներքևից եզերող ժայռի գլխին: Պատանիները ցած նայեցին և ահով ընկրկեցին. ներքևում ահռելի անդունդ էր, որի հատակից սկսվում էր Արարատյան դաշտի մի նեղ կտորը: Երևում էր, որ անձրևի ու ձնհալի ջրերը Հովազաձորից այդ ժայռով են թափվում, հազարամյակների ընթացքում նրանք հղկել էին ուղղահայաց իջնող ժայռի ճակատը:

Հը՛, կարո՞ղ ես այստեղից իջնելու հնար գտնել, հարցրեց Աշոտը: Առաջ գնա, ցած նայիր, ի՛նչ ես...

Նա չշարունակեց, թեև շատ էր ցանկանում վրեժ հանել Գագիկից՝ իր խոսելու մասին նրա արած կծու ակնարկների համար:

Ե՞ս... Սա ի՛նչ է որ... Դու էլ վախեցող մարդ գտար.. Մի պարան տուր, էս բռպեխ կախվեմ:

Եվ Գագիկը ահով ետ-ետ գնաց, բայց այնպես, որ իբր քար է փնտրում անդունդը նետելու: Քարը գնաց դիրդաց ներքևում ու լռեց:

Տղաները հայացքով լուռ գնում էին շրջապատի ժայտերը ու ելք էին որոնում:

Արևելքից դեպի ցած էր ձգվում ժայտերի այն պարիսպը, որի ճակատով անցնում էր այժմ փակված կաժանը: Նույնպիսի մի ժայռաշարք արևմտյան կողմից իջնում դեմ էր առնում անդունդին: Այդ ժայռ-պարիսպները աջից ու ձախից իրենց ծայրերը բերել-մոտեցրել էին իրար ու գրեթե փակել Հովազաձորի դեմքը, ինչպես երկու կողմերից իրար մոտեցած վարագույրի փեշերը: Նրանց միջև մի նեղ տարածություն էր մնացել, երկու բարձր պատերի միջև սեղմված մի նեղլիկ միջանցք: Այդ միջանցքով ներքևում երևում էր Արաքսի հովտի մի նեղ շերտը:

Եթե որևէ հրաշքով աջ ու ձախ ժայռաքարերի ծայրերը մոտենային իրար մի քիչ ևս, այնպես կփակվեր Հովազաձորի առաջը, որ միայն Մասիսների գագաթները կերևային, մեկ էլ՝ երկինքը:

Ավելի պարզ պատկերացում տամ ընթերցողին: Լվացվելիս միացնում ես երկու բուռ, որ ջուր լցնես մեջը: Հենց այդպես միացրած ափերդ ցած կախիր և վերևից նայիր: Վերևի կողմից հենց այդպիսի տեսք ունի Հովազաձորը: Իսկ եթե ջուրը երեսիդ խփելուց հետո ձեռքերդ այդպես կուց արած պահես աչքերիդ դեմ՝ դարձյալ նույն Հովազաձորի տեսքը կլինի, բայց այս անգամ արդեն դիմացից, Արաքսի հովտի կողմից:

Ոչ մի կողմից այդ ձորը երևալ չէր կարող: Հովազաձորը երևում է միայն դիմացից, երկու կողմից իրար մոտեցած ժայտերի արանքով: Այդ արանքով էլ



ձորի կենտրոնն է միայն երևում, նրա մանր ձորակներն ու խորշերը այդպես էլ ծածկված են դրսի աշխարհից:

Ահա ինչպիսի թաքուն ու փակ վայր էին ընկել մեր պատանիները:

Ի՞նչ նյութից կարելի է պարան պատրաստել, ինքն իրեն շնչում էր Աշոտը: Ապա սթափվեց ու կանչեց. Պարանի մասին՝ հետո: Հիմա գնանք սնունդ ճարելու...

Կաքավներն էլ թաղվելու միտք չունե՞ն, հագիվ նկատելի հեզանքով հարցրեց Գագիկը:

Աշոտը խեթ-խեթ նայեց նրան, երևի դեռ սիրտը մոկտում էր ձեռից թռած որսի համար:

Պատանիները գնացին դեպի աջ ժայռաշարքի ստորոտը, ուր ցարուցրիվ, մեծ ու փոքր ծառեր կային: Նրանցից մեկի բունն ի վեր բարձրացել էր սնձի մի ճյուղ՝ կատարին կարմիր հատապտուղներ:

Հասն հևալով ու դժվարությամբ ծառը բարձրացավ և սկսեց քաղել ու ձյան վրա թափել թոռոմած, իսկ շատերն էլ արդեն չորացած պտուղները, առանց սրանցից մի հատիկ իր բերանը դնելու:

Մինձը քիչ քաղցրավուն, բայց անհամ պտուղ է, մեջը լիքը խոշոր կորիզներով և չնչին «մսով»: Բայց այնպես, ինչպես մեր պատանիներն էին քաղցած, կբազմապատկվեր այդ հատապտղի համն էլ, արժեքն էլ:

Ամեն մեկն իր համար ուտի՞, թե՞ հավաքենք, հետո բաժանենք, հարցրեց Գագիկը և նրա տոնից հասկացվեց, որ նա ձեռքն ընկածը տեղն ու տեղը խժոռելու կողմնակից է:

Իմ կարծիքով մենք օրինակ կվերցնենք Հասոյից, ասաց Շուշիկը:

Դե Հասոյի համբերությունը Գագիկին որտեղի՞ց: Եվ նա հատապտուղը հավաքելիս երբեմն մոռանում և գլխարկի մեջ զցելու փոխարեն բերանն էր զցուս:

Վա՛հ, էս սունկն ի՞նչ գործ ունի էստեղ, վերևից գոչեց Հասուն՝ սնձենու փշին խրված և չորացած մի սունկ ցած նետելով: Բոյնախը հոտոտեց և՛ սինձը, և՛ չորացած սունկը, և իր ճաշակին ոչ մեկը հարմար չգտնելով, շարունակեց պագած նայել դեպի վեր, տիրոջը: Նա լեզուն հանած անհամբեր ծնրում էր, որ նշանակում էր. «Վերջապես մի կտոր ուտելիք էլ ինձ համար ես ճարելո՞ւ, թե ոչ...»:

Ի՞նչ աներ Հասուն, սիրտը մղկտում էր շան համար, բայց ուտելիք որտեղի՞ց: Նա իջավ ծառից և սկսեց ընկերների հետ հավաքել թափված պտուղները:

Սարգիսը դժվարությամբ խոնարհում էր իր երկար հասակը և պտուղը վերցնելով, գողունի բերանը գցում այնպիսի ճարպիկ ու արագ շարժումով, որ նկատողը չէր ասի, թե սա թամբալ Սարգիսն է: Ուտելիքի տեսքից նա մոռացել էր երեկոյան ստացած լուռ նախաստինքը, ինչպես և մոռացել էր մտքում տված խոստումը՝ իրեն պահել այնպես, ինչպես վայել է մարդուն:

Երբ Աշոտը փռեց իր պիջակը և հավաքված հատապտուղը հինգ հավասար մասերի բաժանեց, Հասուն նրան մեկնեց չոր սունկն ու հարցրեց.

Բա էս ո՞նց բաժանենք... Եվ իսկույն կարմրելով ավելացրեց. էս էլ տանք մեր Շուշիկին...

Էլ չկա՞ր... որտեղի՞ց գտար, հետաքրքրվեց Աշոտը:

Ծառի վրա տնկված էր փշին... Սպասիր մի լավ մտիկ անեմ:

Տերևներից գրկված ծառի վրա դժվար չէր նկատել երկու գորշ կետ ևս: Նորից սունկեր էին:

Հասուն գլուխը քորեց:

Բարակ ճյուղերի վրա է... ես դժվար հասնեմ...

Ուժ չուներ, ինչպե՞ս բարձրանար:

Տղաները ներքևից սկսեցին փայտեր նետել և հաջողեցրին սունկերից մեկը ևս վայր գցել:

Աշոտը, չգիտես ինչու, ոգևորվել էր:

Թրջենք-փափկացնենք, որ հետո խորովենք, առաջարկեց նա, սունկերը դնելով քարե մի գուռի մեջ հավաքված ձնաջրի մեջ:

Հա, թրջիր, թող մեծանան... Բայց աչքերդ պսպղում են, ի՞նչ է պատահել, Աշո՛տ, հարցրեց Գագիկը:

Շատ կարևոր բան: Հաստն շատ կարևոր գյուտ արավ: Ի՛նձ լսեցեք: Տեսնո՞ւմ եք, որ ասում էր բնության գործերից վատ ենք հասկանո՞ւմ: Հիմի որ կուշտ ընկույզ կուտենք...

Ոչ որ ոչինչ չհասկացավ: Քաղցած մարդու ազահությամբ ծամում էին նրանք հատապտուղն ու հարցական նայում իրենց պետին: Աշոտը ծիծաղեց:

Դժվա՞ր եք հասկանում... Մոռացել եմ, որ ոչ կարգին, բնասեր եք, ոչ էլ որսորդ: Ախր այս սունկը սկյուռն է տնկել ծառին, չորացրել, որ ձմեռն ուտի: Ի՛նչ էլ բարձր տեղ է տնկել, որ ոչ որ չփախցնի իր պաշարը... Հիմա, հարցր դա չի: Հիմա մի բան մենք հաստատ գիտենք, որ այստեղ, մեզնից քիչ հեռու, սկյուռ է ապրում...

Քանի՞ կիլո միս կունենա, իսկույն հետաքրքրվեց Գագիկը:

Շուշիկի նիհար դեմքին մի թույլ ժպիտ երևաց:

Մի՛ ծաղրիր, հարցր միսը չի: Սկյուռը չնչին միս ունի, բայց, մեծ պաշարներ... Նրա շտեմարանը պիտի գտնել, ահա թե ինչ...

Ա՛յ, հիմի որ մարդավարի ես խոսում... Իսկ ինչպե՛ս գտնենք:

Խելքո՞վ: Տեսե՛ք, ընկույզի ծառը մի քսան քայլի վրա է՛ ու տակին ընկույզ չկա: Ուրեմն, սկյուռը հավաքել-պահել է: Կհարցնեք՝ որտե՞ղ: Պարզ է, կամ ծառի մեջ,

կամ նրա շրջակայքում: Վեր կացեք խուզարկենք ամեն ծակուծուկ...

Մեր պատանիները նախ հետազոտեցին ընկուզենին և նրա՝ մեջ ոչ մի փշակ չգտնելով, սկսեցին քրքրել խաշամը, չոքեչոք փոցխել հողը, խուզարկել ծառի տակ մեկնված «եզնաքարերի» խորշերը:

Այդ տաք լանջին, ուր քամիներ չէին բռնում և ուր ժայռը անդրադարձնում էր արևի ճառագայթներն ու ջերմություն թափում իր տակ, ձյունը հալվել-«չալ էր ընկել», և եթե երկու օր էլ եղանակը այդպես գնար՝ ձյան հետք չէր մնա:

Շատ չոքեչոք արին մեր պատանիները և հոգնած ու ձեռնունայն նստոտեցին ջերմացած խաշամին:

Վա՛յ մեզ, որ մի խեղճուկրակ սկյուռի աշխատանքով ենք ապրելու... գանգատվում էր Գագիկը. Բռունցքիս չափ էլ չկա, նա ի՞նչ է, որ հինգ մարդ կերակրի... Մարդ այդ մասին մտածելիս նույնիսկ անհարմար է զգում... Այ, մի քարայծ լինե՞ր, ուրիշ բան: Գնանք նախամարդու մահակներն ուսներիս դնենք, ընկնենք այրերը, գուցե այծերի պատահենք... թե չէ մեր մահակները պարապությունից ձանձրացան:

Իգուր է, ձեռքը բացասաբար շարժեց Աշոտը: Չե՞ս՝ տեսնում, այսքան ման ենք գալիս քարայծի հետքի չենք հանդիպում: Չենց ձյունն սկսել է գալ, թողել-հեռացել են: Երևի նրանք էլ են վախեցել, որ փակված կմնան այս ձորում...

Մինչ նրանք գրուցում էին, Հասոն ընկել էր մի մոշահավի հետևից: Սա թփից-թուփ էր թռչում և ճշում տագնապով, մինչև որ պարսաստիկի ուղարկած քարերից մեկը վերջ տվեց նրա փոքրիկ կյանքին:

Թփերում մոշահավ շատ կա, չվախենա՛ք, թռչունը ձեռքին խմբին մոտենալով հայտարարեց Հասոն:

Է՛հ, դու էլ... Մի լորի չափ էլ չկա... ձեռքը արհամարհանքով թափ տվեց Աշոտը:

Հասոյի թափն իջավ, իսկ Շուշիկը հանդիմանանքով նայում էր Աշոտին ու մտածում. «Բոլորովին նրբանկատ չի... Ինքը որ խփած կլիներ, կգովեր, երկինք կհաներ իր որսը...»:

Ձյունը հալվեց, կաքավ բռնելու մեր մեթոդը անպետքացավ: Գուցե մագից թակարդներ շինենք, հը՞... Բայց ոչ ձիու մագ ունենք, ոչ թակարդի մեջ շաղ տալու հատիկ...

Աշոտը խոսում էր ինքն իրեն, ավելի շուտ՝ մտածում էր բարձրաձայն:

Այսպես մեր պատանհները ծանր վիճակից ելք էին որոնում, իսկ Սարգիսը ներքևում, ժայռի մի բեկորի տակ մեկնված-արևկող արած՝ ննջում էր ու երագում այն երանելի ժամանակները, երբ իր հայրը ճոխ սեղաններ էր բացում շրջանից եկած (մանավանդ ստուգման համար եկած) մարդկանց համար:

Ինչե՛ր չկային այդ սեղանների վրա... Եվ ինչպե՛ս ինքը նագ էր անում, երբ ճաշի էին հրավիրում: Ինչպե՛ս էր չարչարում մորը: «Մարդ ուտելիքից կկշտանա՞ որ», մտածեց տղան և նրան թվաց, թե իր կյանքում երբեք կշտացած չկա: «Ա՛խ, մի կտոր սև հաց լինե՛ր, էն, որ գցում էինք մեր շանը, հավերին...»:

Թուլացած և հուսահատ նա նվում էր: Բայց ապրելու բնագոյր թելադրում էր շարժվել, մի բան ձեռնարկել:

Նա ձեռքով սկսեց փորփրել քարի տակ, խառնել խաշամը:

Հանկարծ ժայռի բեկորի տակ, տերևներով քողարկված մի անցք բացվեց և նրանից մի ընկույզ գլորվելով լույս աշխարհ դուրս եկավ: Սարգիսը մի ակնթարթում ընկույզը թևքի մեջ թաքցրեց և գողունի նայեց չորս կողմը, հո ոչ ոք չնկատե՞ց: Ո՛չ, ընկերները ինչ-որ բանի մասին տաք-տաք խոսում էին: Նա առաջ սողաց, անցքը լայնացրեց և աչքերը պսպղացին. խորքում ընկույզի կույտ, էր երևում...

Տղայի մեջ վայրկենապես ինչ-որ ուժեր ծնվեցին, վերակենդանացավ: Ընկեր ու աշխարհ մոռացած, նա մեծագույն գգուշությամբ գրպանները լցրեց ընկույզով և մի քար խցկեց անցքը, Որ շտեմարանի տերը մնացածը շտեղափոխի (որպես

պահեստապետի որդի՝ նա այդքանը հասկանում էր...): Ապա վեր կենալով՝ քայլերն ուղղեց դեպի մոտակա թփուտը, որի մեջ իրենց գլուխներն էին ցցել մանր ժայռերն ու ժայռաբեկորները:

Ո՞ր, Սարգիս, հետևից լավեց Աշոտի ձայնը:

Տեսնեմ թփերում մամուխ կգտնե՞մ, շուտ գալով, անսովոր սիրալիրությամբ պատասխանեց նա:

Հա, Աշո՛տ, ես էլ մամխի գնամ, համեստությամբ ասաց Հասոն և, թույլտվություն ստանալով՝ Սարգսից վերև մտավ թփուտը:

Մնացածները նույնպես ցրվեցին և ում հաջողվեց մի քանի բուռ մասուր կամ վայրի ունաբ գտնել, գրպանում պահեց՝ երեկոյան ընկերների հետ կիսելու համար:

Միայն Սարգիսն էր ժայռի հետևն անցած՝ գաղտագողի ուտում համեղ ու յուղալի ընկույզները և որքան ուտում էր, այնքան ագահությունը մեծանում էր նրա մեջ:

Մի բան վատ էր, որ այդ աներես Հասոն չէր թողնում, որ տղան հալալ իր բանին կենա:

Սարգի՛ս, մամուխ եմ գտել, արի քաղենք, վերևից ձայնեց նա:

Այս Բոյնախն էլ մի կողմից է խանգարում, պպգել է առաջը և ծմրկտալով, խաշամն ավլելով ուշադիր նայում է, թե ինչ է ուտում ինքը: Անպիտանը չմատնի՞... Լավ է, որ լեզու չունի, չի կարող պատմել, թե չէ...

Քաղցած կենդանուց անոթ զգաց, թե՞ վախենում էր, որ Հասոն նկատի, նա ժայռի տակ պատկեց բերանքսիվայր և կենդանական բնագոյով շարունակեց մեկը մյուսի հետևից ջարդել ու ոչնչացնել բարակ կեղևով և լիքը միջուկով պտուղները: